

「國家社會科學基金重大項目」

何建明 主編

中國地方志
佛道教文獻匯纂

寺
觀
卷

(195)

 國家圖書館出版社

【國家社會科學基金重大項目（11&ZD119）】

中國人民大學佛教與宗教學理論研究所

何建明 主編

中國地方志
佛道教文獻匯纂

寺觀卷

（195）



國家圖書館出版社

武夷山志卷之八

武夷董天工典齋氏編

籍溪羅良嵩

極峯

重刻男才

青樂三編機經甫

氏校刊

溪南

玉女峯鵠立溪畔峭拔爲諸峯第一高數十仞無徑可躋上稍侈其頂花卉參簇若鬢髻舊志云孃孃婷婷有姝麗之態良然兩石附於後如侍女隨行之狀

詩

玉女峯

宋李綱

風舞芳林鬢脚垂朝雲暮雨濕仙衣不知當日緣何事
化石山頭更不歸

〔玉女洞〕玉女峯之背又有二泉不涸

〔粧鏡臺〕在玉女峯側故名峯首迴顧形如勒馬又名勒

馬巖壁間刻鏡臺二字循巖而西曰土地嶺南壁刻西來巖三字

〔詩〕
粧鏡臺

宋楊時

濃淡煙鬟半雨晴
溪光初借晚霞明
鰲頭湧出三峯秀
天漢融成一鑑清
枌社有誰藏舊牒
賓雲無處問遺聲
幔亭寂寞仙何在
勾漏丹砂早晚成

又

明馮繼科

玉女峯前粧鏡臺翠蘿雲擁錦屏開溪聲曲折猶南下
山勢盤旋自北來一幅丹青浮島嶼千葩紅紫綴巖隈
乘槎擬覓靈源去醉度虹橋跨鶴迴

浴香潭溪自北來至玉女峯下停澗始東淵然澄碧舊
名檀香潭國朝施侍讀閏章易今名

題詩石倚玉女峯麓半插水中上有前人刻字歲久多
不可識

印石近玉女峯方正如印在水中

香梳石近玉女峯形類梳浮水面

仙館巖玉女峯北橫亘溪西與溪北仙榜巖相對巖上

正貢山志

卷之八 溪南

有厂其中石若几榻舊志以爲仙家翰墨之館又名仙學堂亦稱學堂巖巖半有石竇填以粉封閉甚固乃嘉靖三十七年直指樊獻科所藏魏王子騫顙骨也下嵌青石小碣勒文記之

說
藏仙蛻說

明
樊獻科

世傳魏王子騫修真武夷山中後仙去嬴秦時置酒會鄉人於山巔其時事邈矣有無莫辨也遺蛻在大王峯昇真洞中來遊者多好觀之道士苦於數躡巔崖乃積其顙骨置常庵偏舍且謂視蛻色紅光爲吉於是好觀者益不能已予竊笑夫托仙蛻以欺罔世人而世人以

功名利達問諸遺蛻可怪也子騫之成仙與否何從知之斯蛻之爲子騫與否何從辨之然仙家嘗稱尸解爲下仙倘所謂仙蛻者或亦可信子又以仙人好避世善神遊竟以遺體暴人間俾得數數玩弄之不亦褻乎仙人果遊於何所曾不能一顧其形骸若云旣脫革囊棄爲無用則世之懷仙者沾沾於斯蛻視蛻竟若龜卜其惑抑又甚矣時僉憲舒君健菴同予遊深然予言乃檄崇安令王子葵爲石函秘藏焉其仙事元微所云虹橋幔亭及太乙宮感應予弗暇論特記子藏蛻之意以告諸後之來遊者

詩

學堂巖

宋 李綱

仙官讀徹蕊珠篇
几案巖中自寂然
崑閩圖書藏策府
誰言孤陋解成仙

仙學堂

劉燭

蒼崖閟仙館
時有讀書聲
餘韻出雲表
冷冷清風生
從之不可得
悵望傷我情

仙館巖

明 蘇伯厚

峭石丹青畫
不如滿山琪樹
學堂虛人間
比歲多荒歉
好借琅函辟穀書

凌霄峯
玉女峯
西極高銳
童頂純赤
又名赤壁峯
無徑

可登北壁有人面石甚無奇

路徑自玉女鏡臺連麓處陟土地嶺其西爲凌霄三
髻及李仙巖諸處此徑從大藏峯後遶出抵御茶園

詩

凌霄峯

明屠隆

絳霄咫尺近丹墀帝座紅雲不敢窺玉女投壺聞笑語
銀河織錦見機絲中天象緯如相勞半嶺風雷總未知
罪謫小臣愁隕越凭高欲懣淚先垂

三髻峯凌霄峯西三峯森秀中者尤聳拔俗呼上卓下
卓謂皆卓然而立也無徑可登

路徑自虎嘯巖梯下至是峯最近由此有徑踰小嶺

達御茶園又有徑從虎嘯南峽中出至星村

虎嘯巖凌霄峯南相傳曾有仙人騎虎嘯其上四壁陡峻懸梯數層以登石壁上下數千尺總爲一厂拔地而起以漸斜出至巔遇雨則崖溜飛下其落處距巖趾約四五丈厂下屋宇風雨皆不及也國朝沈宗敬有虎嘯八景詩

企仙臺虎嘯巖之次級也舊有崇真庵嘉靖間重修今廢

駐真洞虎嘯巖之上級南壁高丈許深廣可容數十人一名崇真洞又名棲真洞國朝王梓因其前臨西溪改名虎溪洞刻虎溪靈洞四字於石壁

定命橋虎嘯巖之絕頂最高處上裂一罅深不可測架橋以度因險故名又巖頂有虎嘯洞

息機亭虎嘯巖際盤迴而上則爲禪院

天成禪院虎嘯巖下明僧麗空構庵於此日虎嘯庵崇正間釋道盛曾住此數年題曰西來巖勒於土地嶺南壁後爲白蓮教佔居王令詳逐并以俸銀二百建造有印牌存武夷宮康熙四十六年釋超煌居之

語兒泉禪院右石隙中循巖流激聲若小兒學語然

歛袖峯太平巖俱依附於巖麓爲院中樓閣連架所及巖後曰茶坡

路徑從鏡臺下泝西溪而入度石橋涉田壟厯陟數嶺再度石橋抵息機亭盤迴而上及庵自庵前循巖而東遶出巖後經茶坡降小嶺履石磴數百級盤入深峽中乃登梯

記

天成禪院記

國朝

王梓

武夷山之二曲有巖曰虎嘯世傳一仙騎虎嘯於上因名巖在凌霄峯南陡峻非數梯不能陟頂裂一渠深不可測彷彿投龍洞架橋踰險石壁鐫名曰定命橋上下數千尺總爲一厂拔地騰空斜覆如屋築宅者可無瓦以蔽風雨庵爲僧麗空所建仍以虎嘯名之又稱棲真

洞建菴之年不可考惟聞萬厯間臨濟空明趣禪師亦曾居此曹洞晦臺鏡禪師初結茅峯頂其徒覺浪盛禪師在洞拜經三年佛光灌頂豁然大悟追晦臺卜居於石瓶巖圓寂黃公端伯銘其塔覺浪應請於圓通而去當其在巖時雅好搜奇另採一石窟題曰西來巖

崇正末

菴衰土人陳德容出家於此既而與其黨霍武聚眾作亂陷邑殃鄰雖投誠勦靖遐邇猶追恨之康熙甲申夏建陽賴响兄弟忽就巖修寨予廉知亟詰鄉長以不報之咎而鄉長言賴响等持老官齋習其教者數百人誰

其敢阻予駭甚疑爲陳德容之續也詳之道府批訊則盜賣此巖者卽故寇霍武之子買巖者卽政和左道問流賴安侯之弟而居間者卽陳德容之子若孫也一班魍魎謀踞官山思患預防所不能已遂詳覆當事有如詳斷令入官不許匪人盤踞之批伏莽潛消鼓鐘斯振矣夫二氏雖殊於吾儒然鼎峙已久亦旣並行並育而浮屠清淨偏於博愛亦覺世救世之一端此昌黎衛道而終不能廢宋儒屹立未常不寄興於其間也全山多棲羽客僧實晨星百年之內二三遺世之老來止來遊於是東苑宗風鼓吹生色一邱一壑次第安禪不特虎

嘯爲然也天童嗣法泉聲叅遍諸方進而尋勝武夷適承其乏准以住持於是聿修舊址孤雲片石厯落增新因顏曰天成禪院予號其溪曰虎溪巖中面目蓋至泉聲而一新也間嘗以山行過訪倚丹崖而烹語泉清話徘徊知其人固世族通才喜吟咏工丹青其亦儒者之同調歟泉聲之鄉人壽宗名超位曾住山北之筇巖好學善事母予爲傳載誌嘉其孝也泉公以世尊之心懋敦儒行澡躬勵俗庶幾以報答四恩者合於人倫之義則名教無乖名山無負豈僅以興復蘭石垂芳奕禩哉泉聲名超煌漳州龍溪陳氏子備述而爲之記

詩

虎嘯巖

朱李綱

昔年雕虎嘯幽巖千里清風皺碧潭
虎去巖空風自冷
一林花雨落毵毵

憩虎嘯巖

明徐燊

丹室初開虎嘯峯飛泉百道翠千重
雨前石塢收新茗
雲際柴扉掩亂松險絕懸崖通小徑
響傳空谷應疎鐘
無人解到幽棲處
堦下惟留猿鶴踪

虎嘯巖

張于壘

重重絕磴接丹梯斷續中間一望齊
小院依巖開向背
亂峯如浪湧高低
風前竹舞醒還夢
林杪禽聲笑亦啼

餘興還尋山下路僧寮只在片雲西

宿虎嘯巖

鍾惺

若比天游宿高深漸不同置身星月上濯魄水煙中登
涉頻勞目眠餐可息躬明朝仍理櫂往返此山中

虎嘯巖

邱雲霄

虎嘯天風凜仙踪煙路迷一從渡河後千載使人疑

登虎嘯巖

明
張蚩蚩